

Cette femme refuscitée adiouſtoit, diſoit-on, qu'après auoir eſté ainſi tourmentée dans le Ciel, vn iour entier, qui luy ſembloit plus long que nos années; la nuit eſtant venuë, elle ſ'eſtoit ſentie réueillée dès le commencement de ſon ſommeil: qu'un certain émeu de compaſſion pour elle, luy auoit rompu ſes liens & ſes chaînes, & luy auoit monſtré à l'écart vne vallée profonde, qui deſcendoit en terre, & qui conduiſoit en ce lieu de delices, où vont les ames des Hurons infideles: que de loin elle auoit veu leurs bourgades & leurs champs, & auoit entendu leurs voix, comme de gens qui danſent & qui ſont en feſtin: Mais qu'elle auoit voulu retourner en ſon corps, autant de temps qu'il en falloit pour aduertir ceux qui eſtoient là preſens, d'une nouvelle ſi effroyable, & de ce grand malheur qui les attendoit à la mort, s'ils continuoient à croire aux impoſtures des François.

Cette nouvelle fut bien-toſt répandue [47] par tout: on la croyoit dans le païs ſans contredit: à ſainct Ioseph on la faiſoit venir des Chreſtiens de la Conception; dans le Bourg de la Conception on diſoit qu'elle venoit de S. Iean Baptiſte, & là il ſe diſoit que les Chreſtiens de ſainct Michel en auoient découuert le ſecret; mais que nous auions corrompu à force de preſens, ceux qui l'auoient veu de leurs yeux, & qu'ils ne l'auoient oſé dire qu'à quelques-vns de leurs intimes. En vn mot, c'eſtoit vn article de foy pour tous les infideles, & meſme quelques-vns des Chreſtiens le croyoient quaſi à demy.

Là deſſus on diſoit merueilles; & pour confirmer plus ſolidement cette verité, ils diſoient qu'en effet le lieu du feu n'eſt pas le centre de la terre, mais bien le Ciel, où nous voyons monter & les feux &